

四庫全書

集部

欽定四庫全書

集部

幔亭集卷十四

詳校官中書

臣徐志晉

侍讀

臣孫球覆勘

總校官庶吉士

臣倉聖脉

校對官中書

臣戴衢亨

謄錄監生

臣姜今熙

欽定四庫全書

幔亭集卷十四

明 徐燾 撰

七言絕句

閩中元夕曲

滿城簫鼓沸春風，爆竹聲喧鳳蠟融。
三十萬家齊上彩，一時燈影照天紅。

家家同結過街棚，夾路花燈列火城。
來往香車渾似畫，

不知身在月中行

閩山廟裡賽靈神
水陸珍羞滿案陳
最愛鮮紅盤上果
荔枝如錦色猶新

珠璣高噴火龍紅
滿架銀花一線通
忽到半空聞霹靂
灞陵橋斷紫烟中

紫騮嘶向月明間
漏盡銅龍尚未還
何處鳳笙聲嫋嫋
松棚高結舞鰲山

烽烟久息海波平
紫陌紅樓樂事多
燈下數聲郎子鼓

兒童爭唱八仙歌

花箋五色製燈聯榜向街頭境社前緩步巡簷看一過
就中都說太平年

無數紅妝去復回竹林仙境起香埃低聲偷向神前祝
願早熊羆入夢來

朱門處處月光流金鼓喧天夜不休堂下裝成獅子吼
一雙爭戲綵絲毬

妖姬三五珮闌珊踏碎香塵月影寒忽聽流星天上起

共停蓮步轉頭看

彤襜高揭露妖嬌
月色燈光映翠翹
年少路傍虛送目
良家女伴轉三橋

風流公子正髻年
腰帶千文萬歷錢
浪買梨花三百朶
一時光照鼓樓前

誰家白晳少年郎
蜀錦吳綾別樣妝
半醉半醒騎馬過
最堪魂斷是龍陽

市上新燈巧樣張
玻璃一片白於霜
夜長滿注瓶中水

幾隊游魚逐火光

流蘇綃帕綴雙懸百對華燈火樹燃
五帝行宮初出境
家家香火送神錢

慶城燈燭夜輝煌照見豐碑字幾行
此是先朝湯沐邑
年年歌舞祭閨王

前代繁華說福州滿城蘭若掛燈毬
于今一盞長明火
勝事銷沉幾百秋

月影遲遲蠟炬銷殘燈同約大家饒
從今處處成遺俗

飽看燈光十二宵

西湖十景竹枝詞

六橋烟棹

柳外春烟午未消
烟深何處認郎橈
小鬟不用頻相問
已約桃花第五橋

三竺晚霞

霞光片片映香臺
花下紅妝笑靨開
預卜明朝天色好
願郎遊騎得重來

九里松風

虬龍千尺翠烟凝
九里濤聲浪幾層
油壁青驄堤上過
同心猶記結西陵

孤山梅月

梅花十畝映湖塘
歷亂幽魂處處香
淡月一輪疎影見
青銅鏡裡壽陽妝

桃溪花雨

桃溪春色武陵同
落盡殘英陣陣風
暗出袖中花一片

問郎何似夜來紅

石屋晴雲

石屋雲開淡復濃
青山微露半芙蓉
一時游女紅妝濕
自在高唐第幾峰

綵鷁紅妝

湖心歌管遏春雲
水底榴花六幅裙
轉過蘇堤歡不見
停橈齊上岳王墳

錦塘春柳

三月尋春到錦塘
青青垂柳一絲長
折來戲作同心結
不是同心不贈郎

龍泓漱玉

驪珠不動小龍眠
井水無波玉鏡鮮
携手與郎同一照
忽驚花發並頭蓮

鷺嶺觀曦

啼罷天雞曙色微
鷺峰高處見朝暉
傍人不用歌行露
夜與郎遊尚未歸

山居雜興

雨後空山剝啄無滿堦
苔色繡氍毹開門忽訝新痕破
知是雙雙過鶴雛

呼童洗硯寫黃庭
手自摩挲舊日銘
漸露滿池鸚鵡眼
猶餘殘繡上金星

桐陰如蓋午風涼
沉水香消白晝長
觸手殘編隨意看
一時書卷亂堆牀

幾年心與世緣疎
獨有雕蟲癖未除
賦就一篇詩得意

人來喜向扇頭書

為耽禪悅久皈依飯貯山瓢施鳥饑總是道人機事息
近前飲啄不驚飛

林深無數鳥爭啼獨立花間自品題畢竟流鶯聲第一
畫樓東畔柳陰西

雲邊松影挂斜陽上下禽聲到竹牀半醉半醒開斗帳
微風吹送玉蘭香

閉却重門竹影疎日長閒疊架頭書放生不守空王戒

故蹴方鞋殺蠹魚

萬竿新竹傍簷牙八面青山一帶遮
斬却當門三四箇
隔雲峯影露蓮花

一夜霜風葉滿庭黃花三徑盡飄零
山房不放秋光去
猶折殘枝插膽瓶

新裁斗帳白生綃百種奇花五色描
鳳蠟低懸通夜照
有人雙度可憐宵

金爐殘火宿沉檀萬綠陰中擁合歡
啼鳥一聲秋夢覺

侍兒剛進小龍團

美人蕉下立紅裙磨得玄精滿硯雲
按寫江南桃葉曲
指尖香粉印羅紋

小詞閒製曼聲歌寫出春閨幽恨多
懶把九宮翻別譜
花間占得憶秦娥

碧紗窻冷晝常關丘壑移來枕簟間
几上石屏嵐翠滴
分明一片點蒼山

何事柴門午未開落花依舊滿蒼苔
只緣欲了分題債

暫禁山童報客來

游武夷發白龍江

荷衣草屨竹筇輕路入丹山謁上清不是離家無別恨
出門先斷世間情

五雲遙望赤松家八月同乘碧漢槎自有仙童親接引
不須沿路問胡麻

塵世蹉跎三十春欲將雲水了閒身清溪無數船來往
能去尋仙有幾人

參駕雲中白鹿車萬年宮裡薦乾魚江頭有客來相送
不唱離歌唱步虛

陳振狂擬遊武夷舟次困溪興盡而返戲嘲

自是青山欠夙因且將蹤跡寄紅塵幔亭指日重開宴
遍問曾孫少一人

尋仙元不屬凡身空負桃花洞裡春豈是漁郎多別恨
玄都只待有緣人

咫尺仙凡路遂分悲君猶自戀人羣待予九轉丹成後

未度他人首度君

何事塵心未肯灰尋真中路忽辭回思君不奏賓雲曲
只唱人間曲可哀

過劍津

神物飛騰自有靈至今風雨帶餘腥道人欲喚龍魂醒
再合雌雄鑄七星

村中晚步

數家茅屋小溪東衰草寒烟夕照中門掩千峰山犬吠

一籬秋色豆花紅

青山迴合抱清溪村徑陰陰鳥自啼落盡疎林秋色晚
水流楓葉過橋西

懷仙館

九曲溪流枕上聽白雲遮斷數峰青金雞叫罷山天曉
鶴在松間夢未醒

懷仙館憶汝翔熙工伯孺因覓伯孺所畫烟雨

圖不得

此地曾聞控鶴來
三人同禮七星臺
一溪烟雨知何處
滿壁丹青翳綠苔

聽劉隱虛道人談玄

指揮如意坐雲根
總是清虛世外言
談到繽紛花似雨
曾無一語及傍門

贈羽士

絕壑凌空鳥道懸
竹房松火亂秋烟
道人不管丹梯險
禁步青山二十年

竹杖遊方幾化龍
知君雲水本無蹤
今朝長揖下山去
他日相尋何處峰

小桃源呈吳元瀚陳惟秦江仲魚

山轉溪迴一徑斜
半栽桑柘半桃花
何年共結茅茨隱
添得人烟三兩家

武夷十咏

玉女峰

五色苔花當繡襦
朝雲暮雨鎖模糊
清溪照出蛾眉影

錯認湖中小姑

架壑船

壑裡藏舟經幾春
溪頭何用嘆迷津
世人自愛風波險
豈是神仙不渡人

仙掌峰

頂門開處即玄關
白日青天去不還
多少幻形俱脫化
獨留仙掌在人間

換骨巖

可憐人世似蜉蝣誰識真還借假脩不學換心求換骨
青山依舊葬骷髏

大王峯

危峰蒼翠插雲中爐裡丹砂色尚紅此地大王曾羽化
至今猶自起雄風

徐仙巖

碧嶂千尋骨一函當年曾此脫塵凡重來忽記前身果
笑指飛昇舊日巖

金雞洞

紅塵容易使人迷
流水無情日又西
大夢紛紛誰自覺
空勞仙洞報金雞

幔亭峰

一曲賓雲酒一卮
共乘鸞鶴醉歸遲
至今五色霞千片
猶似當年結彩時

投龍洞

空有輝煌玉簡書
莫疑雲氣不重嘘
神龍本是飛騰物

肯向千年洞裡居

虹橋板

一從仙樂散丹霄千載長虹亘未消
待得丹成生羽翼
手攀日月過虹橋

游仙曲

萬里遙天片月明玉皇開宴會蓬瀛
瓊漿飲盡歸玄府
鶴背瑤笙四五聲

形容如鶴蛻如蟬一夕凌虛去杳然
隔斷紅塵三萬里

閨風吹上大羅天

藥珠宮殿玉宸君
身上霞衣五色文
不用驂鸞過碧海
鳳簫聲裡駕紅雲

雲裡騎龍訪列仙
羽衣霞佩去翩跹
不知一枕邯鄲夢
遊徧神州幾洞天

踏碎烟霞謁帝鄉
空中鸞鶴自迴翔
腰間帶有降魔劍
一道精光燭混茫

偶別玄都玉笥班
却藏名姓到人間
須臾跳入壺中去

白日青天何處還

桃花澗訪呂山人

長日青山歌采芝
人間甲子不曾知
却嫌住近桃花澗
花落花開見歲時

紫陽書院

水自茫茫山自青
荒祠千載寄精靈
道人已作黃冠客
不著儒衣拜考亭

玄都觀尋道士不遇

洞門寂寂鎖烟霞此是玄都道士家雞犬無聲丹竈冷
深溪流出碧桃花

別虛道人

與師分別亦關情不記形容記姓名聞說還童有真訣
白頭人又是前生

懷鄭君大

幾人白首困塵氛垂老看山獨有君莫道年高筋力少
芒鞋曾踏一梯雲

同元瀚惟秦雨宿舟中懷惟起弟

細雨扁舟泊近村
三人同卧亦銷魂
誰憐此夜孤身客
山店殘燈獨掩門

西蜀竹枝詞

杜鵑啼上海棠枝
赤甲山前月落遲
斗帳夜寒春夢醒
笛聲吹過竹郎祠

春暮感懷

春光將老杏花殘
猶自驚心帶淚看
記得去年今日裡

布衣羸馬出長安

清明有感

人間春色太無情
不管音容隔死生
滿地梨花墳上雨
一番零落又清明

郊行

日暮空林野鳥歌
新墳古塚滿山阿
不知白骨埋多少
依舊青山四面多

為屠田叔題王玉生山水冊

青山如黛草萋萋古寺殘鐘隔遠溪
客散長亭天色晚
兩行烟柳灞橋西

蒼茫綠野接江天漁父中流獨扣舷
何處月明堪繫纜
樹陰西畔小橋邊

二客來尋草閣幽况逢隣舍酒新篘
主人日暮歸來晚
帶有青蚨在杖頭

閒來約客訪烟霞行到橋邊日已斜
尚隔寺門三五里
且將瓢笠宿山家

山中日暮起西風，隔嶺霞生石壁紅。
對坐共憐秋色好，數株松影半林楓。

峻嶒孤塔影中流，萬頃江天一色秋。
恍似金山高處望，片帆無數出瓜洲。

蘭漿搖搖下急灘，滿天風雪正漫漫。
莫嫌野店村醪薄，消盡深溪一夜寒。

千尋瀑布響空林，數尺危橋出樹陰。
欲向溪南訪真隱，飛花滿路白雲深。

枕上偶成

山館雲寒枕簟清，隔窗殘月不分明。
黃鶯未醒人先醒，卧聽枝頭第一聲。

九仙觀晚步

獨携雙屐訪烟霞，畫閣朱闌夕照斜。
清磬一聲山院寂，流鶯啼過木棉花。

夏日瀚上人過訪

綠陰深處響新蟬，移得蒲團柳影邊。
數曲碁殘天未暮，

更燒山茗結清緣

聽錢叔達彈琴時叔達將歸吳興

竹院微風動晚涼
冰絃花裡按宮商
憑君莫作思歸引
一曲哀聲易斷腸

山園雜興

信步荒園日幾迴
秋風吹老壁間苔
澆花正怪兒童懶
忽見松陰片雨來

雨夜讀伯孺詩草

空齋寒夜雨聲聲細讀君詩欲四更
十載悲歡燈影裡
同遊風景最關情

秋日山行

行盡空山日未斜
隔林烟火見人家
澗邊小犢眠衰草
風動滿園蕎麥花

感舊

秋光依舊滿房櫳
鏡裡鉛華漸不同
去歲今宵卿憶否
錦衾香煖燭搖紅

哭林逸人

水明樓上看明月共對冰盤品荔枝今日譖成君不見
年年腸斷荔枝時

昔年遺我青精飯藥氣浮空滿筋雲風雨空山寒食節
一盂何日薦孤墳

記得方山昔日游逢君瀨水苦相留從今若過方山路
不忍重維瀨水舟

憐君易簣垂亡日值我囊書遠別秋欲哭靈幃山水隔

空將雙淚寄人流

將赴京作

北望幽燕欲斷魂
留連未忍別家園
直須三徑秋光老
開盡黃花始出門

題諸友送行卷後

七年三上春官日
各賦詩篇送我行
今日蠹魚生滿紙
主人依舊一儒生

興田驛讀鄧汝高題壁詩

故人半載天涯隔得見題名勝夢思今日經過驛亭裡
再三吟咏壁間詩

路經武夷以公車期逼不得重遊溪口別壽卿

和叔二道友

當日仙槎九曲乘奇峰五百恣攀登此行苦為虛名累
一宿烟霞也不能

何事人間最可哀朔風零雨向燕臺白雲隔斷清溪口
不許紅塵客再來

張去華席上聽妓

燕姬二八欲傾城
學得江南子夜聲
莫遣歌喉頻宛轉
留將今夕喚卿卿

落第後戲作

楊柳如絲草似茵
輕羅小袖白綸巾
紫騮嘶向平康路
妬殺春風得意人

南旺湖泛月

蘭舟乘月下黃河
一片清光漾碧波
宛似江南湖上景

分明惟欠采蓮歌

別梁玉

何物臨歧繫所思
佳人偷指綠烟絲
重來試看門前樹
留得青青有幾枝

彭城夜泊書事

十年此地幾經過
數點漁燈起棹歌
今夜滿天喧鼓角
隔江帆影戰船多

舟中望雲龍山有懷陳幼孺

雲龍山下泛歸舟對景空懷昔日游聚散無期俱是夢
黃河依舊向東流

逢從征歸卒

遠望邊城戰氣寒王師十萬半凋殘但能留得生還骨
莫問金瘡血未乾

脫却從征舊戰袍夢中猶記醉蒲萄從今愁說沙場事
路上逢人賣寶刀

同謝于楚表小脩汪肇邵詹淑正李季宣陳從

訓集謝在杭席上贈伎

相逢流落總天涯
暫借清尊醉狹邪
坐有逐臣心正苦
月中休用泣琵琶

揚子橋別馬季聲

秋風搖落滿征帆
揚子橋邊酒半酣
一棹蕪城君獨往
月明今夜我江南

金閨別李二

天涯搖落正深秋
一別親知雙淚流
不但思家心獨苦

斷腸今日是蘇州

舟夜即事

金閶亭下解蘭橈
一水吳江去漸遙
秋夢纏綿渾不醒
月明齊上度僧橋

枕前雙淚落天涯
半是思君半憶家
起坐不知風露冷
一汀斜月照蘆花

弔關盼盼

十年三度過彭城
燕子樓空月自明
欲弔香魂尋舊塚

斷碑無主不知名

吳門戲寄陳伯孺

一望蘋花十頃秋
闔閭城下久停舟
除將訪道尋僧外
半為真娘住虎丘

無題和徐茂吳司理

繡閣重重鎖翠娥
春風簾幙度微波
紅牙一拍芳心亂
腸斷江南子夜歌

年少誰家傅粉郎
舞裙歌扇斷人腸
當筵一道微風起

吹出羅衣賈女香

獨離幽閣影隨身紅拂楊家是麗人自有繞梁聲宛轉
不愁羅襪步生塵

劈開金鎖出重門學得文君半夜奔但愛風流人似玉
不知年少是梨園

含羞含態步遲遲南北峯頭月落時此處留儂儂已住
從今莫唱惱儂詞

金縷歌成恨幾重看君樂府演臨邛塲中多少憐香意

今夜歡娛盡屬儂

響遏行雲是此聲
况看人似玉壺清
蛾眉不惜從君死
只為當時一笑情

生前憔悴死含冤
半臂猶看帶血痕
我亦多情病司馬
不知何處弔香魂

葛陽道中

插棘編籬小徑斜
數聲雞犬出山家
褰帷最愛秋光好
一路牆陰木槿花

青樓曲

沉香亭畔啟雲屏
一樹垂楊拂地青
暫繫紫騮歡莫去
盤中新有五侯鯖

帝城三月雪全消
新柳如絲學舞腰
何處女郎齊度曲
桃花春水赤欄橋

金屋誰家罷管絃
博山沉水尚留烟
夜深月到流蘇帳
照見鴛鴦作對眠

燕子樓中午漏遲
茶蘼花影上簾時
含嬌自起開妝閣

學取西山畫黛眉

既別田叔歸過困關公署悵然有懷

關外車聲不可聞溪邊公署閉寒雲從今來往困溪路
定憶風流屠使君

高閣三層傍水開詩人多在此銜杯從今磴道空危絕
若箇詩人得上來

題江仲魚小像

五色靈芝五粒松往來長躡白雲蹤畫師未許君丘壑

不寫清溪一片峯

題遇上人小影

清溪流水漾松花
獨倚孤松不結跏
安得添余丘壑相
林中同吃趙州茶

題羅太學青雨軒

小小軒窗匝密林
山鳩啼晝亂雲深
飛來雨氣青如染
半帶松陰半竹陰

題伯孺兄弟臨池小隱

幽居疑是子雲亭
水繞柴門晝不扃
獨卧西堂清夢遠
春風池上草青青

題美人孤鳳

樓上簫聲久不吹
梧桐花下立多時
此身豈少雙飛翼
不到成雙不肯騎

題美人對局

綠雲妝罷下朱樓
閒向春風結伴遊
携得楸枰連袂去
花間同賭玉搔頭

題宋畫宮扇

樓船航海事飄零無數蛾眉恨血腥團扇獨留宮樹影
六陵何處見冬青

鑾輿東下指臨安北望中原路渺漫
寫得殘山兼剩水只留團扇與人看

團扇當年巧樣裁宣和殿上幾徘徊
丹青絹素俱零落獨有蛾眉怨未灰

題滕王閣圖

高閣峻嶒章水邊
曾從南浦繫歸船
披圖忽訝身如夢
回首春風二十年

題畫鵲

不向枝頭說是非
性靈雖巧已忘機
夢魂只傍垂楊宿
未可輕從濟水飛

題畫翡翠

長喙如朱翠羽齊
寒蘆聊借一枝栖
越裳久已無人貢
好向林中自在啼

題興公扇面小景寄懷惟秦

萬仞高峰列翠屏
寒雲流白樹流青
恍疑九曲同游日
對坐溪邊鐵遂亭

題薛素畫蘭

朱鳥窻前翠黛殘
閒將幽恨寄齊紈
薛家閨秀稱雙絕
洪度花箋素素蘭

空說湘江九畹春
殘枝憔悴不堪紉
深林豈是幽香少
半採天涯寄遠人

題薛姬畫芭蕉

名冠青樓有幾春
琉璃硯匣自隨身
相思不寄崔徽筆
但寫紅蕉當美人

題陳伯孺墨梅

庾嶺曾看雪萬枝
生綃今見墨淋漓
江南多少思歸客
莫向天涯笛裡吹

題興公畫山水

古木蕭蕭陰溪曲
滿山蒼翠飛林麓
扶筇行過小橋西

隱隱書聲出茅屋

山色蒼茫烟水深
小舟撐出綠溪陰
一竿獨釣中流影
誰識悠悠隱者心

題顧世卿畫緋梅

一枝玉質襯紅妝
月裡妖嬈雪裡香
莫向天台山下種
恐將春色誤劉郎

題雪簫畫蘭

齊紈開處便氤氲
移得天香澧水濱
自有佳人留楚珮

不須重說馬湘君

題劉道子畫果

五指低垂綴一柯名園佳果似兜羅生來自有黃金相
欲向阿難頂上摩

右佛手柑

嶺南荔子似閩中寫出纍纍錦一叢記得高涼當日事

兩株斜映小窻紅

右荔枝

題葛玄方朱竹

丹鉛隨意寫生綃幻出空林絳玉簫五月十三曾一醉

至今紅暈不能消

題伯孺桃源圖

落盡桃花閉洞門
重來無處覓仙源
于今又隔千餘歲
知是秦人幾代孫

題幼孺所藏薛濤小像

濯錦江邊一麗人
千秋傳得鏡中身
自慚不及高千里
未識花容真未真

半幅丹青異代情
誰人題作校書名
寫生不用桃花紙

兩頰芙蓉暈自生

題櫻桃黃鳥

櫻桃顆顆爛如霞
曾獻炎方產內家
寄語金衣舊公子
不須銜出上陽花

題公洛所藏伯孺畫小景

滿目溪山筆下成
山邊山外有溪聲
憑君欲領溪山趣
但向綠榕橋上行

題畫杏花

一枝春色露名園
幻出花神半醉魂
猶記白門橋下路
紫騮嘶過酒家村

題杏花戲贈幼孺

半幅鰐脂濕未乾
誰將春色寄毫端
山窗無事閒相對
猶勝慈恩寺裡看

題伯孺山水

訪寺尋僧亦是忙
賞春猶覺少壺觴
總緣家近溪橋上
來往不知山路長

伯孺作溪樓聽雨圖見貽詩以酬之

獨掩柴門客到稀
臨池生紙墨花飛
主人莫道無相贈
風雨溪山盡帶歸

題畫士女

琴操

二十年來舊管絃
幾家車馬鬧門前
誰知萬劫青樓恨
盡在西湖一語禪

樂昌公主

菱花初剖鏡分鸞十載長持半面看約得幽期正月望
人間天上共團圓

文君

豈為新緣勝舊緣却因詞賦暗相憐世人不解心中事
只說蛾眉愛七絃

盼盼

劍履塵埋已十春教成歌舞不隨身泉臺得早重相見
深感多情白舍人

秦弱蘭

莫笑郵亭一夜春此身元已落風塵韓家亦有如花女
枕畔衣裳着向人

聶勝瓊

解將紈素卸花鈿誰識新歡是舊緣從此相思千點淚
不須和雨到窻前

楚娘

入宮元不愛蛾眉來是歡娛去是悲不有新詞消盡妬

此身依舊路傍枝

曹妙清

比玉芳名號雪齋更無春色入幽懷
橫琴獨坐香閨晚
欲把新詩和鐵崖

題雙文小像

鸞箋半幅為傳神
畫裡相逢夢裡親
安得人間綵灰酒
鶯鶯夜夜似真真

題畫芍藥送張叔麟

相送愁吟芍藥詩丹青聊贈挿瓶枝披圖不盡銷魂意
何必垂楊綰別離

舊歲與伯孺諸子泛舟白沙分賦野航恰受兩
三人之句余已賦排律一章茲伯孺復出玉
生所作扇頭前景因重賦絕句題其上巳亥
二月三日

去歲仲冬齊汎艇戲將聯句效城南眼前風景猶如昨
又過春光二月三

題雜畫

綠樹千重水一灣
白雲飛去鳥飛還
莫疑此地無人住
若箇山人肯住山

同搖蘭漿月如霜
江水江烟共渺茫
滿樹松花風落盡
前船香似後船香

獨撫孤琴意自閒
滄浪一曲水雲間
磯頭向晚不歸去
為愛前溪雨後山

羣峯雪後玉嶙峋
無數梅花滿路春
竹杖芒鞋過橋去

山中高卧更何人

相逢同息樹邊身總是桃源洞裡人
月照疎林天漸晚
曾無一語到紅塵

已分為漁老此身歸來月下捲絲綸
此中自是堪逃世
却笑嚴陵釣富春

半溪流水一孤桐對坐山中俗慮空
所惜知音今漸遠
不堪極目送歸鴻

題郭熙畫冊

行盡空林到水窮
隔江雲樹遠溟濛
柳陰坐待斜陽渡
剩看殘山一抹紅

題呂紀雙雞雛

五德初生彩質奇
花冠金距是何時
他年定起劉琨舞
莫謂雌雄未可知

水明樓聽雨荅二孺

莫怪溪樓冒雨來
萍蹤無定老相催
縱今歲歲來相訪
百歲曾無六十回

五月十三日從羅山堂分得黃金間碧玉竹栽

植小園戲作

栽竹須乘醉日栽移將奇種出香臺
貧家莫道無珍玩多少黃金碧玉來

種蠟梅

五出寒香淡淡黃羅浮仙子幻新妝
開時記取休輕折留與蜂兒補蜜房

山齋獨坐懷惟秦客粵

清客相過更有誰閒心惟許白雲知山房多少思君意
半在焚香煮茗時

香閨七弔詩

余觀古今閨秀或有流落風塵匹耦非類或有委
身文士終爽宿盟者每親彤管輒興哀無情之地
爰賦短章招其魂氣名曰香閨七弔用附冥感之
誼

蘇小小

油壁青驄久寂寥
西陵松柏雨瀟瀟
夢中解唱黃金縷
脉脉春情總未消

薛濤

雲箋彷彿見羅裙
縹緲歌聲去不聞
千樹桃花零落盡
不知何處弔孤墳

霍小玉

誰將薄倖負娉婷
怨魄啼魂喚不醒
我有多情雙眼淚
一回開卷一回零

崔鶯鶯

淚光如瑩臂銷紅一夕幽期月影中
千載重關蕭寺靜更無環珮響輕風

非烟

一片春情暗寄郎碧苔箋與錦香囊
此身拚為情郎死不向秋風怨北邙

李易安

銷殘金石怨雙蛾紅粉由來薄命多
一縷香魂飛不散

月明時聽曼聲歌

朱淑真

朱粉慵調倦理妝知音難遇有情郎可憐一片西湖月
只向深閨照斷腸

己亥夏杪客居玉田旅次寡歡情鍾艷骨
孤燈真想今夕何年同病相憐惟我幼孺
錄而寄之庶其和余

幔亭集卷十四

欽定四庫全書

幔亭集卷十五

明 徐燾 撰

詩餘

閨情 賣花聲

遠信阻青禽幽怨難禁寒更孤枕半邊衾鐵馬聲殘金
鴨冷月在花陰 雙靨淚痕深濕透羅襟當初誰信有
于今衣帶漸寬腰漸減空結同心

秋思

南柯子

柳葉含愁黛菱花照淚妝些兒閒事惱人腸不忍燈前
重憶解羅襦鐵馬嘶風緊銅龍咽漏長夢魂隨月到
伊傍無奈醒來依舊惡思量

春思

點絳脣

金谷香飄綠楊枝嘯鶯聲巧殘紅輕掃滿徑胭脂遶
蜂蝶無情苦被東風惱春歸早佳期漸杳鏡裡鉛華老

感舊

傳言玉女

淚眼朦朧滴損桃花雙頰起
傍朱闌聽東風啼鴂舊歡
如夢隔斷雲山千疊恨柳
嗔花怨蜂愁蝶 沉水香酣
倚薰籠腸萬結綠波春草
記去年離別那忍春歸又
見梨梢飛雪褪盡鉛華鏡
中妝靨

春怨

賣花聲

春雨夜瀟瀟目斷藍橋夢中猶憶翠雲翹
覺後淚痕空自濕無限魂銷
瘦損沈郎腰虛度良宵何時金屋貯
妖嬈燈下凝眸羞不語同解羅綃

春情 蘇幙遮

篆烟微燈燄小羅帳香酣一夜春多少鐘漏沉沉人悄
悄含醉含醒夢只巫山繞枕雲濃梁月皎笑語叮嚀
此意休忘了無那隣雞聲太早顧影倉皇莫待紗窗曉

別意 柳梢青

鶯語聲吞蛾眉黛感總是銷魂銀燭光沉蘭閨夜永月
滿離尊羅衣空濕啼痕腸斷處秋風暮猿潞水寒冰
燕山殘雪誰與溫存

旅况卜筮子

深閨白露寒古驛丹楓暮鴈叫蘆花四五聲衰草天涯
路不見相思人空見相思樹剩水殘山無限程立馬
斜陽渡

閨情阮郎歸

愁雲殘雪滿燕關深閨頻倚欄鏡中誰與畫春山啼痕
損玉顏憎畫舸怨雕鞍郎行何日還湘江千古淚潺
潺誰留竹上斑

閨怨

阮郎歸

琴調別鶴鏡分鸞孤燈清夜闌龍鍾雙袖不曾乾無人
空暗彈紅袖褪翠眉殘肌消玉釧寬燕山莫道客衣
單閨中寒更寒

春怨

如夢令

一夜風狂雨妬孤枕寒燈難度杜宇太無情苦喚東君
歸去春暮春暮飛絮落花無數

閨思

憶秦娥

遊人別幾回夢斷花間月花間月關山兩地一般圓缺
青樓鴈盡音書絕可憐空帶同心結同心結燈前偷
看寸心都折

青樓曲 少年遊

綠雲梳罷碧紗窻裡方自按箏篴青衣報道才郎到也
忙步上妝樓 酒沽醺醺杯傳鸚鵡花下遞相酬檀板
輕敲清歌未闕月上簾鉤

寄遠 訴衷情近

孤燈細雨枕畔淚痕無數幽期難託琴心愁緒怕傳尺
素暗想香肌艷質放誕風流腸斷朱絃暮天台路遙
在桃花深處芳閨冷落只恐青春誤憑誰訴而今佳會
蹉跎後日相逢無據早遂藍橋遇

荔枝

浪淘沙

夏日山居荔枝正熟偶憶歐陽永叔浪淘沙詞風
韻佳絕遂按調效顰歌以佐酒本欲為十八娘傳
神反不堪六一公作僕矣

高樹錦蒸霞朱實清華一丸寒玉裏紅紗萬顆纍纍閩
海上不數三巴 西域枉乘槎馬乳休誇剖開瓊液碎
丹砂異品即今誰第一猶說江家

丹實滿林醺耀日紅酣由來佳品壓江南漢苑楊梅應
避色盧橘香慙沁齒有餘甘玉液中涵釵頭一朶美
人簪記得樂天曾有句映我緋衫

樹樹火連空綠葉芄芃朱顏妖麗玉肌豐傳說琅邪王
少女十八娘紅 分摘滿筠籠錦繡成叢半林香氣度

微風却笑杜陵詩句好只憶瀘戎

驛騎走紅塵一笑華清炎方何用獻朱櫻天寶梨園新
度曲小部音聲 鼙鼓動西京妃子心驚梨花魂斷不
勝情翠袖紅綰俱是夢水綠山青

十里錦雲鄉傳粉凝妝紅裙爭看綠衣郎黑闥闕稍頭朱

柿小玳瑁丁香 延壽品非常尤勝陳江繡鞋一種記

閩娘風送瑞堂香百步結綠硫黃

一品狀元紅金線金鍾麝囊吹散桂林風黃玉紫瓊真

勝畫江綠叢叢 雙髻翠雲鬆
蘭壽香濃綠珠魂在玉
堂東五嶺三巴無此種
獨擅閩中

白玉瑩肌膚輕襯羅襦
鳳凰岡上錦千株任是
崇龜工墨妙香味難圖
百果更誰如羞殺楊盧
品題猶說蔡君謨
蠲渴延年還補髓一罐
醍醐

庭靜午風涼荔子盈筐
小姬纖手解羅囊玉腕
冰肌相掩映百步聞香
含笑問檀郎何似儂妝
紅顏薄命總堪傷
因憶驪山當日事閒
說明皇



幔亭集卷十五